

Nuorttanaste

Hærra! Orromvisten læk don læmas
migjidi sogast sokki.“ (Salma 90, 1).

„Occet baica Ibmel rika, de buok dak
digjidi addujuvujuk!“ (Luk. 12, 31.)

Nr. 7.

17. jakkegærdde.

»Nuorttanaste« maksa ovta kruvna jakko-
dagast, bladde dinggujuvvu juokke poasta-
rappe bokte.

Korsfjord'ast:
15ad April 1915.

»Nuorttanaste« olgusboatta guovte gærd-
manost — dam 15ad ja dam 30ad bæive
juokke manost.

Min ače ape.

Soames sajin Englandast læ dat boares vierro, atte mærrabivdde, ouddalgo son hoiggada vadnasa mæra ala, luoittad čibbi ala ja cælkka: „Varjal mu, Ibmel, dastgo mu vanas læ nuft ucce ja du ape læ nuft stuores!“

Dat satta goččujuvvut oane-kaš ja buorre rokkusen.

Ja dasto manna mærrabivdde valnasi, gressa bajas borjasid ja borjana olgus hammanest.

Daggar rokkusa galgašeimek mi buokak oažžot dile doallat, man doaimast mi aia læžžap.

Juokke idded čuožžop mi odasist abegaddest. Mi gullap dam baroid šavvamen favlest skoaddo duokken. Vanas læ garves ja mi lavkistep sisa, mutto maid ape satta čajetet migjidi, go mi ollip favllai, dat læ čikkujuvvum min oundast.

Doallop mi damditi min rokkusa. luoittadepok čibbi ala ja celkkop: „Varjal, mu Ibmel, dastgo mu vanas læ ucce ja du ape nuft stuores!“

„Du ape,“ dam sane siste læ dam boares mærrabivdde siello. Dat læ su oskodovdastus, su oagjebasvuotta.

Mutto maidai ællem stuora ape, man ala mi juokke idded ferttep, læ du, o Ibmel. Vaiho min vanas læ ucce, borjastep mi daddeke oagjebasat; dastgo ape læ du. Don oainak min, don doalak min du giedain, nuft duotta go mi læp mannam vadnas sisa duina, min Ibmel ja ače.

Šaddok Hærra vidnegardest.

Sodnabæiveskuvla læi loappam; mutto oapatægje datoid manaid vuorddelet uccanaš; son aigoi halastet vebaš singuim.

„Nuftgo di oaidnebetet, de læ mist sagje æmbo klasaidi, ja ædnag manak elošteke gæčos sodnabeivid madi (gatai) alde, Gæč-čalepet ožudet soabmasa mielddak deike. Nuftgo balkkan aigom mon juogadet addas soames ođda, čabba muittalus-bittaid.“

„Mon im oažo ovtage miel-
dam“, læi dallanaga soames gutte jurddeli; „i dat veket dattetet ovtage“.

Mutto okta ucca gandaš celki ješ aldseisis: „Mon aigom gæč-čalet dakkat, maid mon satam. „Son manai sidi ja celki aččasis:

„Rakis ače, aigokgo don mu mielde sodnabæiveskuvli?“

„Mon im sate goit lokkat,“ vastedi ače miedetemin.

„Gal oapatægje harjeta du lokkat“ celki gandaš.

„Juo, mon aigom du mielde sodnabæiveskuli.“

Nubbe sodnabæive bodi gandaš skuvli daina stuora „skuvlagandain“ (elev). Son vuostaivaldujuvvui stuora iloin, ja oapatægje algi harjetet su lokkat. Go oapatægje nuft doaimati oanekaš aige, bodi dat stuora „skuvlagandain“ jorggalussi, ja de oažoi son nuft stuora halo algget bargga-
goattet sodnabæiveskuvlast. Dat læi šaddam sudnje stuora buristsivdnadussan. De šaddai son sodnabæiveskuvla-emissæra (sardnedægje), ja njælja jage gæčest

læi asatam 400 sodnabæiveskuvla, mak čakkijegje skuvli 30,000 mana.

Gæča. nuft Ibmel buristsivd-
nedi dam ucca gandaš, gutte læi jegolaš dakkat dam, maid son sati. Dat dakko buvti šaddoid Hærra vidnegarddai.

Jottolagast.

Arbmo ja rafhe lekus buok Ibmel manaidi ja blade lokkidi!

Moai dam blade redaktørain vulgime Fielvuonast ovta dampast. Son galgai mannat Lagesvudni ja mon galggim finadet daggo birrasin ja oappaladdat Samid Vargonuorest Hammerfest suokanest. Mutto lagamus orrostam baikest manai Ovla Andras gaddai ja jorggali ruoktot, ja mon šaddim vuolgget nuertast. Must læi sagga illa miella, mutto mon šaddim vuolgget miellan vuostai. Mutto Ibmela gæinok æi læk min gæinok.

Go mon bottim Honningsvaagai, de mannim mon gaddai ja vurddim lokala. Sæmmast dollim mon ovta čoaggem. Lokal mielde mannim mon Lebesby, gost Olav Korsvika bodi dampi, ja dat læi su gæn mon galggim dæivvat ja jottet ovtast. Mon sittim su vuolgget mu mielde, dastgo mon legjim amas; mutto son læi mannamen Skjætningbergi. De illa monge vulggim gaddai dainago mon legjim amas. Mu mielast oroi atte mon im læm dokkalaš oažžot guoime, atte lifči havskeb jottet. Daddeke mannim mon gaddai ja daggavidi mon vulggim bagjel vare Olderviki, gost ija orostim, ja

hubbe bæive vulgime daloisedin šisa Skogviki ja bedime N. Nilsen dalloi, gost læi sikke igjasagje ja „velkommen.“ Ibmeli lekus gito, go son læ rappam visti ja vaimoi mudnji, gutte im, lifči ansašam maidege burid Ibmelest, mutto su armostes læ son valddam mu su mannes ja andagassi luoittam buok mu suddoid, man dafhost mon læm sagga ilost, go must læ dat stuora duodaštægje Ibmel Bassevuoigna, gutte duodašta mu vaivani, atte mon læm Ibmel manna ja læ laiddim mu su duottavutti.

Skogviki doollim mon čoaggim, ja læi hayske Ibmel manai guim orrot ovtast, go sist læ soabalašvuotta. — Ja sodnabæivvai læi mæreduvvum čoaggim vuodnabatti Biettar dalloi. De vulgimek dokko, ja go mi dokko bodimek, de mon vurddim, atte si gudek legje mæredam čoaggim, galgge maidai lokkat; mutto de bigje si amas lokke lokkat, ja dast šaddai hayske, go Ibmel manain læ okta addijubme. Ja dast legjim mon amas, mutto go čoaggim gargai, de ravkai okta amas abba mu vuolgget su mielde. Ja mon legjim sagga duttavaš ja gitim mu rakis bæste Jesus, gutte læ rappam gaino su manides oudast. De bodime bajas vuodai John Andersen dalloi, gost mon bessim orrot. Ibmel buristsivndekus sodno dam rakisvuoda oudast, maid soai daid beivid siste čajetæiga mu vuostai!

Igjavuonast orrom mon bælnub' vakko ja olbmuid læi duotta halo gullat Ibmel sane, ja lifči viššalak čuovvot gulddalet Ibmel sane. Burist golai aigge must sin butte. Im sate gal cælkket, atte dobbe læi lossad mudnji sarnot. Dovddim njalgahaja ovta rakkasemus vielja mannel, gutte læi læmaš ouddal mu dobbe. Son læi erit Tanast, okta gutte læi čuovvomen Jesus juolggeluoddaid ja nuft læi viggam maidai olbmuid čuovvotet. Son i læm oskeldam olbmuid Judalažaid skipi, mutto Jesusi, mi læ osko algatægje ja loappa, ja dasa likoi mu vaibmo sagga burist; dastgo mon læm borjastam Judalažaid skipa

siste i0 jage arvo, mutto de forlisi dat skipa ouddalgo juksim vanhurskesvuoda, ja de i gavdnum mikkege masa mon lifčim galgam dorjit; mutto ferttijim orrot dego okta mato ædnamest daihe dego manna, mi i bæsa bajas ouddalgo ædne valdda.

De legje muttomak, gæk čierro čalmin jerre must, velgo læ sigjidi Ibmel arbmo, gudek æi mate rokkadallat, mutto lifči vaimohalo audogassan šaddat. Mon ferttijim čajetet dam sænma osko skipi, masa dat amas viellja ja vela sarnedet Ebr. girje 11 kapitall. Rakis sielok, osko bokte læ buok

boarrasak ožžom buorre duodaštusa j. n. v. Rakis sielok, mon im sate æra digjidi ravvit, jos di vela jærašeide gammar balvvalægje lakai, maid galgam dakkat, vai audogassan šaddam? I Paulus čajetam gudege æra dakkoi go oskoi. Rakis nuorak ja boarrasak, gudek almai matkest lepet ja jurdašepet juksat vanhurskesvuoda, i læk mikkege mi læ dokkalaš Ibmeli — min dakko daihe vanhurskesvuotta læ dego okta billašuvvam bivtas. Faresealažak doivvo, atte si jukse vanhurskesvuoda, si bargge dam ala gukkis rokkadusai guim ja olguldas čabba dagoiguim, mutto æi si juksam. Mutto bakkenak, gudek æi barggam dam ala jukse vanhurskesvuoda. Man bokte? Osko bokte su ala, gutte suddolažaid vanhurskesen dakka, namalassi Jesus Kristus, gæn ansašeme bokte sattep mi audogassan šaddat. Buok læ vejolaš dasa gutte osko, ja osko boatta Ibmel sane gulo bokte. Jos mi dam jurdelifčimek, maggar ansvara læ, atte mon læm čokkedam sardnægje sagjai, de mon ferttim sust adnut famo, atte son su Bassevoinas bokte oapestifči mu ja dasto vela daidge, gæk læk bigjam sin juolge dam ællema gæino ala. Leket varrogasa, rakis vieljak ja obbak; dastgo aigek læk varalažak. Bærgalak manna birra dego gilljo legjon ožododin, gæn son satta njiellat. Orru mu mielast dego aimo sevnjudæbme orru, Kristus almostus lakka. Damditi berrep mi rappat čalmidemek ja giddadoallat duottavuodast ja

bissot manalaš oskost ja vuolle-gašvuodast. Gost suddoid andagassi addijubme læ; dobbe læ ællim ja audogasvuotta.

Ibmel ačče varjalifči min erit čagjadusain, ja jos fal læžža oktage čagjadus gæinost, vækketifči son sin duottavuoda geidnoi! Jesusa savcak dovdekk su jiena, abmasa jiena dak æi dovda æige dato čuovvot. Damditi leket buttasak vaimost, dastgo si galggekk oainet Ibmela. —

Ollo vaimolaš dærvuodak buok Ibmel manaidi ja „Nuorttanaste“ lokkidi.

Sardnejotte N. P. Garggo.

Brævak.

Porsangost

Failla divvujuvvu.

»Nuorttanaste« nr. 5 alde læ čallujuvvum mu bittai; ja gæča velrika laga § j. n. v.

Dam sagjai galga læt, ja gæča rika rangastus laga §. j. n.

J—e.

Hr. K. Hansen!

Du hæbutus suimamidak mu vuostai »Nuorttanaste« nr. 4 alde sidan mon du ruoktuk gæssik dam blade bokti vuostamuš boatte aigist oudalgo ašše vidasebbu vuolggga daihe manemusta april loabast.

Daga dam farga jos aše ik datuš vidanik.

J—e.

Gudnijattuvvum bravačallik!

Redaktora læ ožžom manga čallag dam »oapponaggo birra,« maid J. e., K. Hansen ja Læstadius oappo čuovvo læ alggam fievredet dam bladest; mutto go mi æp gavna maidege bajasrakkadusaid daihe avkid daina, de gavdnap mi buoremusen ja jierbmalemusen, atte orostattet dam naggo daggo bokte, atte æp valde šat blade dai ovtage bitta dam aše birra; dastgo dast i boade mikkege æra go avisnaggo.

Sænma lakai loappatep mi maidai dam »skænkka potetos naggo,« man birra maidai læp ožžom moadde gukkis čallaga (olles foredragaid), main ain čallik daid potetosid birra. — Go mi æp gavna dainagin čallagin maidege avkid ærago dušše min ucca

bladaš saje čagetuttit, de diedetep mi sëmmost, atte mi æp sate daid bittai sisavaldet ja æpge dastmanŋelge valde. Min lokkek darbašek blađe saje avkalebbo čallagidi.

Allus oktage værranekus, mutto valddus dast oapatusa.

Allet čale maidege cukcasid, gielasid daihe joavddelas visastallamid blađđai; dastgo daggar čallagak læk dušše vahagen. Čale alo duottavuoda ja nuft atte ik darbaš ballat namad almostattemest!

Muittet maŋašassi dam, atte »Nuorttanaste« i fievred maidege poliitikalaš naggoid, nuftgo dat maidai i haled ovtage gudne daihe buorre nama billedet, i ge kristalaš servid soardet; mutto dušše eniggit daggo goggo ællem ja ouddagovva i serva okti dovdastusain ja Ibmel sane mielde.

Jabni diedetusak æi galga goussege bære gukket čallujuvvut; dastgo sagje læ uce.

Gudnebalolažat
Redaktøra.

Madavarjagost.

Had mars dpatuvai likkotesvuotta dabe. Guokte vielj ča Reisuonast (Bugøfjord) læiga njuorjoid livdemen, ja dam vuolde dpatuvai likkotesvuotta. Bisso bavketi ja luodda manai siskabæle juolge mietta ja čada čoarbačle olgus, ja dakte cuovkas smavva bittan. Son dolvvojuvvui daggaviđe Čaccesullu buoccevisstui, gost doktor čali juolge guovddag daggo goggo luodda læi mannam, ja čoağgaš daktebittaid ja bijai okti, ja doaktariet læi buorre doaivvo juolge boatet. Dak læiga Vagge Mathe Ola barne guovtis.

Oppeti læ likkotesvuotta dpatuvvam malmfeltast, gruvva gavpu-gest. Okta dynamita ladda bavketi ja 4 olbma labmašuvve, mutto æi jabmam. Nuft čajet ain Ibmel daidi æppeoskolažaidi, atte si fuomašifči man dilist si ravkik vagjolik, vai si dagašegje buoradusa. Vuoi, man farga šadda olmuš eritsirddujuvvut armo aigest; mutto avo galle si æi fuomaš.

Stenkoalak læk divrrum Girkkonjargast, 3 kruvna hl. Jaffoid fidnijek vela kommunest kr. 28,50 säka; mutto gavppeolbmak valddet 34 kr.

*

Sëmmost gitam mon dam blađe redaktøra dam rakisvuoda oudast, atte

don læk vastedam min jæralnasa, ja dal læp mi ožžom vastadusa min uca blađaš stuorručeme harrai nr. 5 alde. Ja dal mon læm buorre doaivvagest, ja gitam din buokaid mieldečuovvok, atte min barggo oudanifči ja šaddaši farga lakai oudeduvvut, atte blađde boadaši juokke vakko olgus nuftgo mi læp arvvalam, aido sëmna lakai go ječage blađek olgusbottik.

Ja vela mon dajam dam, atte mi Samik, juokkehaš, mi dovdap ja rakistep min vanhemidamek giela, go mi oažžop lokkat min ædnegiela, ja dast ollo čuvvggitusa ja rakisvuoda fidnip mi.

Di vieljak ja oabbak, allop mi hæite min barggomek gaskan, mutto barggop dam ala atte min aidno ædnegiella blađde šadda stuorebun ja jottelebbun. Lekop mi arvoka ja ovtamielalašvuodast oažžot čambo doallid. Ja mon avčom din atte čallet dam blađe videdæme birra. Mon gitam du T. Thomassen, go læk čallam blađe videdæme birra maŋemuš nummarest

Ollo dærvuodak blađe lokkedi gukken ja lakka.

M. Mikkelsen.

Mu rakis sidaguomek

Lagesvuonast.

Mon læm fidnam din buokaid viesoin. Ja jos dat læš maŋemuš gærde go mon čelkam dam, de læ must juokke lakai læmaš din lutte buorre dille, aido nuft moft juo lepet sattam stellit mudnji. Dast datošim mon fast ruoktot maksit digjidi.

Di ballabetet buokak, daihe diettebetet, maggar varalaš vašalaš tereg læ. Dam im darbaš mon obba muittaletge. Dat buoremus gaskaoabine dam oažžot erit daihe soattat dam vuostai læ **huttisvuotta**. Ja go mon diedam, atte ædnagiin din viesoin læ luttahažak ja manga lagaš čurrugak, dattom mon vækchetet din dal giđa aige ja gæsseg atte eritbæssat daina; dastgo dak læk mæsta dak varalemus njoamotægjek, luttahažak ja čurrugak. Daid olgus oažžot daihe eritjavkkadet mattebetet di oažžot must daggara mi dasa heive.

Buokak gæk dal čaletek ječasek mieldehatton »Lebesty maiblomst forenegi« soattat tereg vuostai ožžuk nuvta must nuft ædnag go di darbašepet. Kontingenta læ 1 kr. jagest.

Go dal šadda maica dalkke, de galgam mon boako bigjat, ja jođam birra din buokaid lutte nuft gukkas go ollim giđast ja gæsset

Usteblaš dærvuodak digjidi buokaidi.

Rikardine Bøgeberg.



Daggobokte diedetuvvu fulkidi ja oappasidi atte

Eugenie Andrea Ingeborg,

Lavonjargast Tanast læ guoddam dam morašlašlage dam 22 mars 1915. Son læi rieğadam dam 5ad August 1901. Su buoccam aige læi gukke ja garas. Son i šat halidam dam mailmai su maŋemuš beivin.

Audogassat læk dak jabmek, gæk gæk jabmek Hærra sistel

Alfred Jessen.

Daggobokte diedetuvvu fulkidi ja oappasidi atte min rakis barne ja vielja

Per Persen

Vestertanast læ eritvagjolam min gaskast dam 8ad februar 1915. Son læi bagjelaš 24 jage boares. Su buoccevutta læi gukke bagjelaš jage, mutto juovlain maŋas buocai son erinoamaš garraset. Jabmem læi sudnji illon go su nana osko læi Kristusi, ja dat læ min jedditus morraš siste.

Per Mortensen, Klemet Persen,
Sjursjok.

*

Dærvuodak must buok blađe lokkidi; mutto erinoamačet Lagesvuona fulkidi, di gudek assabetet Dorskašvuonast.

Per Mortensen.

„Nuorttanaste” redaktøra

vasiti bæssači dam jage Guovddagæinost, gosa ollo olmuš læi čoağganam daid mavsolaš basidi. Bæssaçak maksit dam sëmna go mæddavasag. Boares testamenta muittala migjidi dam maŋemuš ija birra Ægyptenest, atte go sorbmijægje engel oini vara, de manai mæddel — vasi mædda. Dast læ bæssačak ožžom dam nama.

Maidai daige bæssači læp mi bæssam muittet dam stuora oaffar Labba, gutte jami min suddoi diti. Ja ollo læi olmuš čoağganam Guovd-

dagæino girkkobaikai, ješguttege su fidnostes, muttomak gullat Ibmel saie muttomak manai gastašet, muttomak naittaladdat j. n. v.

Dam have leimek mi 3 sardne-olbma, namalassi sami stuora dača Wangberga, Furevika ja redaktøra.

Mist legje juokke lakai havskes bæivek, ja Ibmel vuoiŋa oappaladdai olbmuid vaimoid ja ædnagid lutte dovdati dat su duojes garraset.

Gieldabappa Smith, gutte jotta boacukommiššonast, læ maidri sidast, ja son čajeti stuora ustebvuoda ja rakisvuoda min vuostai. Ibmel buristsivdneokus su ja su æmedal Smith læ fast ožžom ovta jage friavuoda jottet dam sæmma boacukommiššonast. — Stuora viššalvuodain læ son oapatallam samegiela ja sardneda dam hui burist. Vare buok Same særvve-godde bapak dam dagašegjel.

Manga oappes usteba legje javkam dam rajest, go mon maŋemuš dobbe fidniin. Jabmem læ valddam su oaffarides, dat maŋemuš læ doluš skuvlaolmai H. Penta.

Illo ja moraš vagjolæba ovtast. Muttomak avvodegje mannaristami ja hæjaiguim, muttomak fast oidnujegje čužžodæimen girkkogardest ja bačča gadnjaliid njiellamen. Soames sin rakkasin læ dokko vurkkijuvvum.

D: gjar læ mailme ællem, moraš ja illo, dat vagjolæba ovtast. Savvamest lifi, atte olbmuk valdašegje vara daina bačča hoddoin, mak deivik min ustebid. Muite, atte gærde oappaladda jabmem maidai duge vieso, ja dalle læ æra go dušše illodet ja rieibmodet garriin oaivest ja i gæččat vebašge lagamuža morraš ja bačadile bællai.

Daddeke læ Ibmel su armostes bajasgoccatam soames sielo maidai Guovddagæino suokkanest. Nuft dæivadeimek mi ovta æccalaš vuoras vieljain, Hentoin, gutte gieskad læ boattam moridussi ja læ dal alggam sardnedet Ibmel birra. Ibmel buristsivdneokus dam vielja buristsivdnadussan ædnag sieloidi. Hævske læi gullat su čabba ravvim sanid nubbe bæssašbæive čuaggemest.

Sardnejotte Furevika galgai su mielde mannat duoddari ja dobbe čuvodet jottesamid mæra rægjai. Ibmel buristsivdneokus dam nuorra vielja, atte vuotaši ædnagid duoddari assin albmait

Daina 4 manain maid mon valddim mannasidi Guovddagæinost ja Macest, manai burist, ja læ dal ollim dærvvam deiki ja loktet burist aige æra manai særvest. Si læ dal gavdnam vieljaid ja oabbaid ja dukkuradet dego ovta vanhem manak. Igo dat læt havske?

Maŋašassi saddim vaimolaš gitosid dæivadæmest Guovddagæino ustebidguim. Ibmel buristsivdneokus din.

Vieljalažat

Din

Ovla Andras.

Mailme-soatte.

Soatte læ mannam su davalaš jođost dam rajest go mi maŋemuš čallimik dam birra; mutto i vela oro loappa boattenen.

Mærrašlaga

bægga læt læmaš Bergen guovlost gieskad

Ruošša

bægga vuoto dakkam Ruošša læ valddam gieskad 2000 fangaid.

Franskalažaid

stuora tapa gieskad læmaš dušše ovta sajest 1500 fangaid

Tuiskalažak

læk massam dam maŋemuš 2 manost 30,000 olbma

Polen oažžo ječis stivra

Kæisar læ mærradam, atte Polen galgga oažžot ječis stivra fargamusat

Tuiskalas

oasta ollo saltegulid Lofotest, 4 miljon kilo dam ragai. Dat hivvodak galgga saddijuvvut Svolværast. Hadde læmaš kr. 6.50 vævtast.

Dynamit bivddim vuostai.

Statsraadast læ mærreduvvum, atte bærraigæččat dynamita vuovddim dai davemuš ædnam osidi vuostaibarggam varas dynamita bivdo Sameædnamest.

Sisagagjum minai 100,000 kruvna oudast.

Bagjel 150 mina læ dam rægjai sisagagjum Bergeni, daihe 100,000 kruvna oudast.

Hæjos bivddosagak

beggek Sameædnamest dam rægjai.

Gidda

læ dal alggam olles mærest dabe miir guovlost. Dat ollo muota læ dal ožžom sato dam goardde bæivadaga diti.

Loppadaddam:

Frk. Gjørtrud Anna Olsen,

Høilid, Senjen.

Aslak Andersen.

Stainarnakek,

mak læk njuvvujuvvum ollesen (jorg-gujuvvum), mak æi læk luddijuvvum ja burist saltijuvvum, ostujuvvujek alemus haddai must

Garver Eidissen, Tromsø.

Æskanjuvvum

čabbat gietaŋuššum boccustæikak, čoamahasaš, čielgek, nuftgo maidai rievsašgak ja gurbmakes boccu-, navde ja buokšlai nakek ostujuvvujek alemus haddai. Gudnalaš ja jotteles opgjøra.

Samegiel čalašæbme.

O. Nilssen,

Kvalshaug, Sortland.

Vuoleduvvum haddai.

A. Larsen samegiel muittalus girje „Bæivve-Alggo“ vuovdujuvu dal 80 ørai, porto 5 øra. Min kommisio-nærak, bigjek dam muittui.

Girje satta dingujuvvut mu bokte.

A. Larsen,

Repparfjord, Finmarken.

Diedatus!

Dain gæin læk værok mævsihaga bærrjek maksit ovdal 15ad april.

Jos dam aige sisa çei læk mak-sam, de šaddik værok pantadusa bokte sisagaiheduvvut. — Dat livi savvamist atte buokak gæin læk boares værok maksek fargamuslagin.

Kautokeino herredskasse

dam 9. mars 1915.

K. Hætta.

»Nuorttanaste« çalle, prenttejægje ja olgus- adde læ Ole Andersen, Korsfjord.